

# Vilipai

## Yeoa Monglamoa Kolvrowol Vivm Losnamona.

---

**1** <sup>1</sup>Poli Timotii kava, Yesus Kristusna andranindrini sambla elohv. Kava tombaiva epiprinv yem indkumbim Sesoatindim Yesus Kristusna, pev ten avm Vilipaikotara. Eva yenam nom Kristusnindna kuwulm, eva engla mokolnindm. <sup>2</sup>Pina ara Sesoa eva pivna mendekli Yesus Kristusoa yemoa undalm vowel evezra, eva yemoa undwonam wonvevra.

### Polna Sembayang

<sup>3</sup>Kava nonamba yemba neng vhueinrava, kava Sesoam kavnamba os omnav, yimba lehra. <sup>4</sup>Wo kava elsus sembayang veluhunv yemba indkumbimba losnamona. <sup>5</sup>Kava yeinda Sesoamba osva omnav, yimba lehra, noinda pev ten kam kolvrinam, nonam kav numhowol vevnam besalnemelmom. Nonamba yimba keknamba undnahonamba kovohlavnamba, amnalmaba mendeklimba, yimba kamba kolvrowol vivna, veiva, daipota men. <sup>6</sup>Sesoa hev kovoreshunna honamba andra besalva yena undrava. Wo himba si yunalm hoanavho vrowovav, verava, os kik vevav, nonam henga Yesus Kristus provram. Kava os nengv.

<sup>7</sup>Wo eva kava nengv, osva kava lehra ninginv snamba, honamba memba yimba avpa indkumbiva. Kava nonora, manara, kava men wonav yemba kavna nengavnangra. Yimba indkumbiva andra wohviv Sesoana wavrana kamongova, nonamba kava buimerava avnamba, nonamba kava dandana vrevnamba besal nemelmomba, si os uvra indhanamba, moamba memba tanamolnam. <sup>8</sup>Sesoava nonora lohv, osva kava yemba mindnam und vowel vev, nongalalm vev. Kava yemba indkumbim und vowel vev, Yesus Kristusna und vowelona.

<sup>9</sup>Men honam kava sembayangmba veluhunv yemba, osm yena und vowelalmba pevna mongawa Kristusnindmba esvema ophunvra, nona

yimba si nonorava avra, wo osoa eva wohlevrapivolvra. <sup>10</sup> Wo yimba di si osva nungluwul vivav, vei, memba mongo besalva, eva memba mongo sahoklalva, wo kikih vrivra besalmangasva. Osm yimba si wuvol wohavra mana vema kethawolhui, Kristusva provrava. <sup>11</sup> Osra yimba si vivra mindnam mana vemava besalangas, Kristusna kolvralnapopol, mendekli nihilm vraholt Sesoom, osoa eva nihilm wulovongomnalm.

**Polna Kinmba Buiriniva, Honamba Andramba  
Besalnemelmomba Hoanavho Vrelmba.**

<sup>12</sup> Seh, kava yemba osm vinv, levrapivolo osm, temba kava buirava avpa, besal nemelmom osm vev, os pehra, os nongara, hoanavho vrelm. <sup>13</sup> Kava buirava av, manara noinda osra, kava keknam undnahonam lohmanavna Kristusmba. Wo noinda osva valgonind no Sisana deuvm men hui kekalvho vruwulvohvnam, eva mongla indhana, men nonora lovahv honamba. <sup>14</sup> Kava mendah men av buimera, heva os monglava Kristusnindva daiptava beswonam av. Hevna novna kamba nunnglutithueiv, osva buira av, wo noinda henamba undnahonamba almba suwemsnamba otavra okilihinv. Wo noinda osva himba voavk vrivmoa, eisholmba besalnemelmomba Kristusnamba.

<sup>15</sup> Memba honamba tanam, osva monglava Kristusmom eishov ambo, noinda kam himba musk viniv, louwolm. Heva os monglava eishopva Kristusmomba, noinda osra himba ambo kam lounakuna ovriv. <sup>16</sup> Himba noinda eishunv, himba avpa wavrana, wo eva himba nonora avpa nomba, osva Sesoa kamba vraohna andrava, dandana vrelmba besal nemelmomba. Wo duangva noinda kamba buiva vina. <sup>17</sup> Heva os nomba himba ambo eishomnav Kristusmomba novtotholm dasalm, manara himba hevmangas ningv. Wo henamba nomba nengavnangva sahoklal. Himba kinm hohholm viniv hom buiram kam.

<sup>18</sup> Heva os owai, kava nengvmoa, nomba temba kamba kinmba huhlimnivpa. Mendekliva noi lohv, himba eishov Kristusmom. Nooa heoa heva mona besalnana vira. Heva os kava indk vethav, eva himba sahonamba vinitava kamba. Kava eva ambo wohindk vethavta.

**Polva Os Unna, Kava Os Nengv, Kava Buiriniva Si Phovav.**

<sup>19</sup> Kava wohindk vethav, manara, yimba sembayangmba vewuvmonav kamba, wo Yesus Kristusna meissisongolva kamba kolvrav. Wo kava noinda nengv, osva hona kinmba Sesooava si pilpiapahavav, pholmba buiriniva.

<sup>20</sup> Kava nomba mindnamba nengvpa men honam, kava si mana vemakoklava vevavmoa, kamba lou venalmba. Kava os undva vrev, kava si pephtovpa selthoavavmoa, os ten doara kav lohvnam, novm wolaihinilm, nona manimani memba kava vevpa, nihil mendekli

wohvraohv Kristusmba kana andrarava huiva petharava. Kava memba mendahva lohvpa, eva mava kam dahavav hona duangna englara. <sup>21</sup>Kava wohatava, Kristusangas mongal monamba, nonamba almba. Wo kamba daharava, os kava pokovav.

<sup>22</sup>Membu osm, kava dawonamba novkakava lohollava, kava si osva wohandra venavra mendeklimba. Wo heva os kava manamsna miva kikih vrevav, almka, o dahalmi? Kava tit vev. <sup>23</sup>Eva saha vrivta, kikih vrelmba. Kava avav hona monana, ora ahavra Kristusiangas. Men hevm besalva monamba. <sup>24</sup>Heva os kava os vev, kamba lelnamba dahavavmoa, yemsna ka kolvwol vei.

<sup>25</sup>Kava os nengv, mendah kanamba andrava lohv, yemba kolvwolalmba. Wo noinda os kava nengv, kava si yemba yunalm wonavav. Kava si yemba kolvwol vevra, indnahonam keknam alm losnamona. <sup>26</sup>Noinda yimba si ind lothopravav Yesus Kristusindava, nonamba kava yemba hengava mongawulmba wonlohvraava.

### Pol Unna, Yimba Doa Kristusnavhora Lovahthei, Kinm Vralm Henam.

<sup>27</sup>Monamba men mendekliva, yeoa wohao beswonam besal nemelmoraoa Kristusindaoa. Verava, ora ka prov, yem nongalalm, verava, ora ka prom owai vev, kava si hillinvav manam manam yenamba besalwevsam. Kava si os hellevav, yimba mendah osangas keknamba mongawundna viv nomba andrava, kolvwol viv indhanam nemelmona. <sup>28</sup>Wo yimba si pemba vinvavmoa, nonamba temba himba yemba sahonamba vinvpa. Memba yimba pevna kelsra doa lovahtanamba, honamba Sesoanamini phov, nethalm indkumbim, osm Vilipainindva si beswonam avav yunalm, nomba ungundva yenamba si himba owolakovunvav.

<sup>29</sup>Sesoava doa dombtreihunna yemba, undnahonam amnalm Kristusm, wo osoa eva henavhoram lovahtalm, kinm dombolm Kristusnam. Memba honamba evrohv mendekli nihilva Kristusmba. <sup>30</sup>Nonamba kava temba yemba wonanamba, yimba doa nunqlina, kinmba kava wulluhka vevnamba. Wo yimba hilliv kinmba, nomba huiva mendah daipotava kava wulluhka vawov. Wo eva snata kinmba yimba vriv.

### Yeoa Pevmoa Dembhapuv Veo.

**2** <sup>1</sup>Wo es hevpa yenamba undmba Kristusva woseinvma? Wo es hevpa henamba wavrava yenamba undmba vi vovhoawol vinvma? Wo es hevpa pivva mongawatilm andra vivma Sesoasongollava? Es hevpa yimba wavrava vinvma monglamba yena pevna wevolmba? <sup>2</sup>Osva verava, ora tanam, kam vinu, osm indk vethara, alm mongawundnam, alm mongawa wavranam, mongal nowolnam mongawundna. <sup>3</sup>Manimani yimba vildaomana vevrava, nonamba manam yimba pevmangasva wivewol

ovuvra, owainonoa. Yeoa pevmoa dembhapuv veo, os ningu, hena wevsam kamoan kuvhoawol vinvra. <sup>4</sup> Manam yimba pevna nihmangasva indva vrivra, heva os ninginvm mongnindna alm mindnamoa.

### **Kristusna Wevolm, Himba Hevmba Nengnamoa.**

<sup>5</sup> Yimba diva temba avpa, yeoa manimani vivm, os Kristus Yesus ten vevnam hena wevolm. <sup>6</sup> Kristusva os manara manara himba Sesoanonoam lohv. Himba lohohra elohv araliva. Heva os himba nengvnamoa nomba, osva Sesoana pusambanakambara wohalmba.

<sup>7</sup> Heva os himba hevna pusambamba velahalahaprona hom petharam. Himba hevmba ombandhana indhanarinikolalm hilvalahana. Hemba avalva lengna indhanarinielm, wo lohna, os ovna, ombandhana andranindrini. <sup>8</sup> Wo nonamba himba huiva avnamba indhanarinielmba, himba hevmba wohipapahanamba, wohengvna Sesoana moamba. Himba wohengna, venamba, dahana sena di krusesra. <sup>9</sup> Noinda Sesoava waivongana senamba Yesusmba, desvhoalmba. Wo Sesoava hemba vraohna nihilva mendekli, indkumbina nihilmba henangas wohkuvhoawol vinv.

<sup>10</sup> Wo Sesoava os ona, indkumbioa mulumbdandna lovahthamnavra, indkumbi di senanind, hui pethanind, eva noi ten pethamera avm.

<sup>11</sup> Indkumbiva si os uvra, Yesus Kristusva mendekli, wo himba ovruhvra nihilva mendekli Sesoam aram.

### **Yeoa Os Avm, Sesoava Undva Yemba Osm Wuleinv, Os Ara Heoa.**

<sup>12</sup> Seh, yimba elsus wohengivna kamba. Yimba wohengivna, nonamba kava yemba wonavnamba. Memba honamba mendekli osva, yimba wohengiv kamba daipotava pevh, eva kava oklava avra. Manara, Sesoava doa yemba lopshana, wo noinda yeoa keknam wohnuwi vruwuvm hona andramoa henamoa. Wo eva yemoa eiswol vivm penahonam. <sup>13</sup> Kava os nengv, Seso yeindava andra vinv merava, yem kolvwolalm, nom velm, noinda Sesoam undnahonam wohkanandharam. Wo himba daswolv yemba keknasowolva, nomba velmba.

<sup>14</sup> Vildavm manimani beswonam moahui, manam yimba pevmba alhuvra. <sup>15</sup> Wo yimba si os avra, mana vemakokla kethawolhui yem. Wo yimba si avra Sesoana towandalnonoa, mana vemam vehui sahoklalm. Wo heva os yimba temba aevulv no indhanamongo, himba doa moamba besalva nombolvhopikovna, wo doa himba esvema lonwoh vriv, sahonam alm. Wo noinda yimba si anilhamana vevra, os ovra, pai lohvoav sikulmeram hona pethara. <sup>16</sup> Yeoa lundthao hemoa hona moana, men nona suvevm nemelalm. Wo verava, nonamba hengava provrava Kristusva, kava si nonam indk vethavav, manara, kava kavna

andrava ombamba visimbeihinnamo yeindava. Nonamba kava os nonglavav kavmba, kava lehnamba, dandwonamba galmba, kava doa mi phona vuherava.

<sup>17</sup>Undnahonamba yenamba snal, oi mana ema besal teteihnungna dembreuhv Sesoam. Wo kamba dahatava duangna englarava, kava si snallava avav, kavna tovolva si moakot vevav diva yena mana ema besal teteihnungrava. Sesoava si nonglarava, wohindk vethavav. Wo nomba osva wohvetava, kava si osva wohindk vethavav, wo kamba pilivhoavav, indk vethinilmaba yem indkumbim. <sup>18</sup>Eva yeoa os wohindk vithuta indkumbioa kamongo.

### Polva Ovna, Timotim Wolaihanginilm Vilipainindm.

<sup>19</sup>Kava os vev, mendekliva Yesusva osva ollava, kava si yemba wolaihaprinav Timotimba lelnam, wenokombawonamba owai. Kava si wohindk vethavav, kava osva hellevrava, ora keknam wohav undnahonam yimba. <sup>20</sup>Kava waiavmoa snamba mongova indhanariniva, memba Timotiva, owai. Himba tanamolnam yemba kolvrowolalm vev.

<sup>21</sup>Monglava indhanamba indva vrev, hevm almngasm nonam. Himba ningvmoa andramba Yesus Kristusnamba. <sup>22</sup>Yimba nonora amnav, osva sna indhanarini lohv Timotiva. Yimba nonora av, himba andra evevna kai, ihishomana evinilm besalnemelmom, os ovna, ombol kolvrav aralm. <sup>23</sup>Kava nengavnangva vrev, wolaihapralmba hemba domba yeindamba lelnam, nonamba kava osva wiyavavpa, ora os si kamba venavav duangva. <sup>24</sup>Kava os nengv, mendekliva si kamba kolvravav, domba prunilmaba yeindamba.

<sup>25</sup>Epavrotitus kana mongawa andranindrini Kristusna. Hemba kava andrava waivena valgonindrini namsamba Kristusnamba. Nonamba kava osva vevnamba, an heva kam kolvrara?, yimba wolaihemmanana kam hemba. Kava nengv, daipota henga men hemba wolaihaprinilmaba yemba domba. <sup>26</sup>Manara, himba nengv mindnam, yemba nongalalmba. Himba duuswonam av, manara, yimba hellemb venamba, os hemba uvavulmungil dihelv. <sup>27</sup>Tanam hemba uvavul venana, wo doa dahavna murapeta hemba. Wo heva os owai, Sesoa vena, hem kolvrana eva kavm, osm vena, ata homeis ka evindilamana vevm heina.

<sup>28</sup>Wo doa kava mindnam und vev, wolaihaprinilmaba hemba yeindamba. Nonamba yimba hemba nunglivrava, yeoa os wohindk vithu. Wo os eva kava yemba wulihawol vevavta. <sup>29</sup>Wo noinda osva losnamona holvoreiu hemoa mendeklina nihilnana. Yeoa sna indhanamo mendekli nihiloi deiswilu, memba Epavrotitusva lohvp. <sup>30</sup>Hemoa mindnam okulivm, manara, hemba doa dahavna murapeta hona Kristusna andrarava. Himba hevna nihtovmba pemba wulkomondha vrenamoa, osmba ata himba os kamba kolvrata yenavhoramba, yimba oklava avnamba.

**Yeoa Novnavhora Vinvm Nonapenamoa, Temba  
Yutanindna Moamba Engivpa.**

**3** <sup>1</sup>Kana Kristustindi, kava henga men yemba os unv, indk vithu mendeklina nihiloa. Kava ovovmoa, honamba mongawamomba yemba novol vinilmба hengava, wo si eva kolvwrol vevav yemba, levrapijlmба, plasramba almba. <sup>2</sup>Novnavhora vinvm, nonapenamoa temba Setanna andrava vivpa diva. Himba snal av, oi winde. Himba undva vrv, indhanana nihtovmба koaihangangvinilm. Heva os kava os nonglav, wevsa sahoklal memba. <sup>3</sup>Noinda kava os nengv, pivva Sesoatindinonoa, himba owai. Noinda pivva sembayangnamba okuliv Sesoamba hevsongolnapopol. Pivva ambo eisil av mendekli Yesus Kristusna nihilna. Wo eva pivva pivmba ningvmoa, wo osoa eva manimani pivpa temba viwul vevpa.

<sup>4</sup>Noinda kava kavmba osva nengallava, kakowa lehra, owainonoa. Heva os himba nomba osva nengallava, kakowa lehra, heoa nomoa lihavra, os kanamba lohv mendekli plalva, kavmba nonglalmba, osmba kakowa lehra wohlohv Sesoana novrava. <sup>5</sup>Manara, 8pelara okombava kamba lohmananamba, avamba kamba lengnamba, os kanamba humumbtava kovhueina. Kava kavpa Israelnindrini, Bensamintindirini lohv. Wo kava Hiprunindrini, araravava kanamba Hiprunind. Wo Mosesna lohohmomba mendekli wohlohvna kaindava. Wo noinda kava wohnilhana Varisielmba.

<sup>6</sup>Kava nonamba keknam kevravna Sesoana andramba, kava indkokla vewol vevna Kristusnindmba. Mosesna lohohmomba kanamba indkoklamba velavranamo espeta. <sup>7</sup>Nonamba manimani honamba kaindava sisiha vevna mendekli. Wo heva os daipotava kava os nengv, manimani nomba temba Mosesna lohohmoriniva kaindava sisiha vevmoa, manara noinda osra, kava amnav Kristusm.

<sup>8</sup>Nomangasva manam manam Yutanindnamba kava ninginvmoa, wo eva manimani hona pethariniva, temba lononglamsna lohv. Mendekliva lohvpa, honi lohv, lihalm vev kana mendeklim Yesus Kristusm. Manara, Kristusindangas kava doa nomba maiethakohana doara. Wo daipotava kava os nonglav, nomba temba manimani ambo ombam lohvna. Honi kamba wolaihana, keknamba kevralmba Kristusmba, <sup>9</sup>wo kava hena wohlohv daipotava. Memba daipotava kava lohvpa helmba, kava lehra windel lohv Sesoana novrava, wo honamba phovmoa mongona Mosesna lohohmoriniva. Sesoanamini phov kavna undnahonarini. Kava Kristusmba undnahonam lohmanavm, wo Sesoava kamba noinda osva nonglav, windel hevm.

<sup>10</sup>Kava mindnamba nengvpa nom, osm lihalm Kristusm keknam, eva vralm nom keknasowolm, nona hev ten henga phona pokamarini. Wo

kava undva mongal vrelm vev, os he ten vrenam, kinm gualm, dahalm.

<sup>11</sup>Kava lohollava hona monanamba, eva osva kava os nengvrata, eva kava si os phovavta pokamariniva.

### Keknam Wohalhmana Vevm, Phosoholm Makram.

<sup>12</sup>Kava osmba onengvmoa, kava doa kavpa, Sesoava os kamba nengmanav, lehra hevpa lohv. Kava mendah phovmoa no makrava, temba lohvpa kalmba, mana emam besalmба vralmba. Heva os Kristusva osm nengmanav kamba, velmba men hona monanata. Manara, Kristusva kamba velavrana hevelmba. <sup>13</sup>Seh, kava os nengv, kava mendah phovmoa makrava. Heva os mongova men lohv, kava elsus velohv. Kava nomba maivethav manam manam doaraminiva. Kava ehanambala kelva towalvpa, kava pholmangas vev makram, dom ten kana novra lohvm.

<sup>14</sup>Kava mendah wohlelawov, pholm mim makram, mana emam besalm vralm sewonam. Nomba mana emava besalva temba manara noinda osra, Seso a kamba kevrana Yesus Kristusna andraram, senakembellam alm.

<sup>15</sup>Pimba indkumbiva memba keknamba undnahonamba avpa, indhana nengavnang besalmsnamba, heoa os ningvrata, makram phosoholm mim. Wo yimba nengavnangva mongalva vrelmba owai vitava, Seso a hev si yenamba nengavnangva henga sishona vowel vinvav. <sup>16</sup>Heva os pioa osangas wohengalvohra moanonoam, piv nona ten avnam.

<sup>17</sup>Seh, yeoa indkumbioa wohengivm kana wevolm, wo lehwol vivm, he ten avm, os men yem kav numtvm. <sup>18</sup>Manara, mindnamba indhanamba ungundmsna amnav Kristusna krusemba. Kava doa doara yemba ishunna, osva sna indhana av himba, wo kanamba wenop dalv, yemba ishunilmba, daipotava hemomba. <sup>19</sup>Himba avpa, himba suwekembel monam naengho ovriv. Sesoamba andrava vinivmoa, himba nomangas laus vriv, hev nom ningvm velm. Nomoa lovahkav, lou noinda vevm manam manam, wo hevmba ambo wivewol ovuv. Wo osoa hev vei, manam manam honam petharinimangas ningv, vewuvmona velmba.

<sup>20</sup>Wo heva os pinamba deuvkembelva mongal indanam luhunv sena, wo pimba nengviliv pivna lopshalnindrini, mendeklim Yesus Kristusm, nominim pholm. <sup>21</sup>Himba si pimba yiv lombawol vevav, wo pinamba nihtovmba hevna nihtovmsna weihaloh vowel vinvav besalalmangas. Pinamba nihtovpa kinna vilov, heva os henamba dendalangas. Kristusva honamba wohvevav hevna keknasowolna. Wo no keknasowolnamba, manam manam himba si hevna anglasingi wohpulundthoavav mongatilm.

### Honi Os Kristusnindoa Vivm.

**4** <sup>1</sup>Seh, kava und vowel vev yemba, wo nongalkalm vev yemba. Yimba kana topimsna hohlolohv kurava Sesoanamini, noinda

kava indk vethav, wo kava ambo eisil avna noindava. Wohengiwuvm osangas mendeklimoa, os ten pevm kav seilm ishunnam. <sup>2</sup>Kava ishunv ungevlirini samblam, Yuotaim eva Sintikim, os yeoa mongawundna ahamno mendeklimoa, osm pevm mongawulm mongawundnam ahalm.

<sup>3</sup>Ka Pol yem kavna sehelm ishomnav Vilipainindrini, yimba mongawundna andra evena kamongova. Noinda kava yemba os omnav, yeoa kolvwolo no ungevlirini samblamo, Yuotaimoa eva Sintikimoa, honam osm evelm. Himba andra evena kamongo, eva numhowol vewuvmona velmba besal nemelmonamba indhanamba. Himba honi englamokol vivna, vena, Klemen eva mongla, noi ten kav wonandra vevnam. Henamba nihilva lopo veluhunv di no tombaira, ten noinda kilihavm, beswonam yunalm wohalm.

<sup>4</sup>Yeoa elsus losnamona amnavm mendeklimoa. Kava ata os ovav henga, yeoa indlothopro. <sup>5</sup>Osm viu, indhanamba indkumbiva yemba nungeilrava, uvra, manam eva indhana windel hevm av. Manara, doa murapeta mendekliva prolmaba vev. <sup>6</sup>Mana vemamba manam mindnamba yimba ningvra. Heva os sembayang vinivm Sesoam nomba mana vemamba, yimba ningrava pevmba. Wo nonamba yimba sembayangmba vivrava, elsus osoa umnivm, Sesoa yimba lehra. <sup>7</sup>Membu Sesoava yemba undwonamba wonvaomana vevpa, noita si yena undna nowolnamba isinvav Yesus Kristusinda. Nomba undwonamba, temba Sesoava daswolvpa, hevm mendeklikumbi, nomba owai, es eva pimba levrapivolvav.

<sup>8</sup>Seh, kava yemba eunillam ishunv. Manam manam nomoa besalmoa wohnengewuvmona vevm, wohkevru yunalm, temba mendekli. Vivm, osm indhanamba yemba nungeilrava, uvra, manam eva hevm lehra viv. Ningvm nom, ovra, memba tanamolnam manam manam, wo elsus vewuvmona vevm wevsu besalangas mana vema kethahui. <sup>9</sup>Wo vivm, noi ten pevm kav nona numhowol vevnam, wo osoa eva pev ten kanamini dumbvnam. Noi vivm, pevm ten kav ishunnam, eva ten pev kam nunglivnam, kav ten vevnam. Wo Sesoava nomba, memba wonvevpa undwonamba almba, si yemba nihra wonvevra.

**Polva Vilipaikotanindm Unna, Yimba Manimani  
Doa Kamba Novoa Vinina, Lehrangas.**

<sup>10</sup>Kava mindnam wohindk vethamnav mendeklimba, noinda yimba henga nengvhuei, kamba nesmos vrelmba. Yimba doara undva vrina, kamba nesmos vrelmba, wo heva os owai, monahui, henashara eva ata yimba ambara vithita. <sup>11</sup>Kava ishunv yemba honam, heva os kava novtoholmba ishovmoa, noindava kava manam manam nom nengym. Kava doa nonglomana vena, osmba doata manam manam memba kava iavpa, temba kamba yimba wulkusomnanamba diva. <sup>12</sup>Membu osm,

kamba doa kepel vovhoana, nismba almba, nonamba mana vemahuiva kava avnamba. Wo eva kam vei, doa kanandhana, nonam manimani esvema kava iavm, manam eva kava sahvra. Kamba doa kepel vovhoana, poaitamba indk vethalmba, osva nonam nonam kamba nonglaphovpa. Kamba doa kepel vovhoana, indk vethalmba, nonamba innemba esvema kanamba nalohvna nelmba, eva osoa nonam kava innehui avna nonamba. Kamba doa kepel vovhoana, undwonamba almba, nonamba manimani kava ambo nosra avna, eva osoa nonam kav nis ambo avnam mana emahui.<sup>13</sup> Wo honamba manimani memba kava vevnamba, kava vevna Kristusnapopol, manara he kamba luthua wulavna.

<sup>14</sup> Heva os memba eva besalta, yimba memba kamba kolvrinamba, nonamba kava osva vevnamba, an si kamba kolvravav? <sup>15</sup> Yimba Vilipainindva mendah wohnengewuv, nom ten seilm kava yem ishunnam besalnemelmom. Nonamba kava Masetonia provinsriniva phovnamba, yengas Kristusnindva ye kamba kolvrina. Yimba kamba nomba diva wulkusomnanamba, kava nona mendeklina andrava vaomana vena. <sup>16</sup> Nonam nonam yimba os kamba dembhemb vewuvmonana manimani, nonamba kolvralmba, nonamba kava avnamba diva Tesalonaikakotarava. <sup>17</sup> Tanamta, memba honamba osmba owai, kava ambo dembewuinra manimani yenamba. Heva os kava yemba osm vinv, honanata wohao, memba wevsava besal moang velliniva phov.

<sup>18</sup> Wo doa daipotava kava eva manam sahvav, doa esvema kelvhoana. Kava noi iav, nom kav nengvnam, noinda osra manimani yimba nomba kamba vininamba, Epavrotitus kamba ipromnana. Yenamba diva snal maim ona, tinen teteihnungna besal, nona ten sembayang vewol vinivm Sesoam, wo kamba yunam wohkanandhana. <sup>19</sup> Pina Sesoava manimani besalangas iav, pim daswolalm Kristus Yesusananamba. Noinda himba yemba si yunalm lundthoavav, nomba manam manam yimba ningvrava.

<sup>20</sup> Pioa okuluwuvmona velohra pivna aram Sesoam osangas osangas yunalm.

<sup>21</sup> Sehmoa prunv yem Sesoatindim Kristusnam. Sesoatindi he noi men hui, he kamongo vivm mongawulm, yemba piembinv sehmobma.

<sup>22</sup> Indkumbi Sesoatindiva yemba sehmobma piembinv. Wo nomba Kristusnindva yemba sehmobma piembinnata, temba nomba andra velvohvpa Sisa King Kuwulna deuvrava. <sup>23</sup> Yesus Kristus pina mendeklioia, heoa yemoa wavra vovhueinvra. Doata.